

JE, WAFU WANAWEZA KUONGEA NASI?

Huduma ya malaika watakatifu, kama ilivyoelezwa katika Maandiko, ni ukweli wenye faraja kuu na wa thamani kwa kila mfuasi wa Kristo. Walakini fundisho la Biblia juu ya jambo hili limetiwa giza na kupotoshwa kwa njia ya makosa yanayotokana na theolojia inayopendwa sana na watu wengi. Fundisho lile lisemalo kwamba mwanadamu ana roho isiyokufa, ambalo liliazimwa kwanza kutoka kwa falsafa ya kipagani, na hatimaye wakati wa giza lile la UASI MKUU likaingizwa katika imani ya Kikristo, limechukua mahali pa ile kweli, inayofundishwa kwa wazi kabisa katika Maandiko, kwamba "WAFU HAWAJUI NENO LO LOTE." Watu wengi sana wamekuja kuamini kwamba ni roho za wale waliokufa "watumikao, wakitumwa kuwahudumu wale watakaourithi wokovu." Walakini [imani] hiyo ni kinyume na ushuhuda wa Maandiko yanayohusu kuwako kwa malaika mbinguni, na uhusiano wao na historia ya mwanadamu, kabla ya [kutokea] kifo cha mwanadamu ye yote.

Fundisho lisemalo kwamba mtu anapokufa anaendelea kuishi, hasa imani ile isemayo kwamba roho za wafu zinarudi kuja kuwatumikia walio hai, limetayarisha njia kwa dini ya siku hizi ya kuongea na mizimu (modern spiritualism). Kama wafu wanaruhusiwa kufika mbele za Mungu na mbele ya malaika watakatifu, na kupewa uwezo wa kuwa na maarifa yanayozidi yale waliyokuwa nayo kwanza, kwa nini, basi, wasirudi duniani na kugawa maarifa yao na kuwafundisha walio hai? Iwapo roho za wafu zinarukaruka juu ya [vichwa vya] rafiki zao waliomo duniani humu, kama wafundishavyo wanatheolojia hao wanaopendwa sana na watu wengi, kwa nini, basi, wasiruhusiwe kuongea nao, na kuwaonya dhidi ya maovu, ama kuwafariji katika huzuni zao? Ni kwa jinsi gani wale wanaoamini kwamba mtu akifa roho yake inaendelea kuishi wanaweza KUIKATAA nuru ile inayowajia kama nuru itokayo mbinguni ambayo inaletwa na pepo [roho] hao wenye utukufu? Hapo ndipo ipo njia inayodhaniwa kuwa ni takatifu, ambayo Shetani anaitumia kutekeleza MAKUSUDI yake. Malaika wale walioanguka ambao wanatekeleza amri zake [Shetani] wanakuja kama wajumbe wanaotoka katika ulimwengu wa roho. Wakati [wenye dini ya mizimu] wanadai kwamba wanawaleta walio hai katika mawasiliano na wafu, hapo ndipo yule mkuu wa uovu anapotumia nguvu yake ya uchawi juu ya mioyo [akili] yao [hao walio hai].

Anao uwezo wa kuleta mbele ya wanadamu mfano [kivuli] wa ndugu zao waliokufa. Mfano huo [umbile la marehemu] unakuwa kamili; mtazamo wake huwa ni ule ule waliouzoea kuuona, maneno yake, sauti yake, huigwa kabisa kwa namna ya kushangaza sana. Wengi hufarijika kwa matumaini ya kwamba ndugu zao wapendwa wanafurahia raha isiyo na kifani kule mbinguni, na bila kushuku hatari inayowakabili, wanatega sikio lao "wakisikiliza roho [mapepo] zidanganyazo, na mafundisho ya mashetani." [1 Timotheo 4:1.]

Baada ya kusadiki kwamba wafu wanarudi kweli na kuongea nao, Shetani anafanya watokee wale walioingia makaburini mwao wakiwa hawajajiweka tayari [yaani, waovu].

Hao hudai kwamba wanayo furaha mbinguni na ya kwamba wanakalia hata vyeo vya juu kule, na kwa njia hiyo uongo unaenezwa kote kwamba hakuna tofauti yo yote kati ya wenye haki na waovu. Wageni hao wasemao uongo [mapepo] wanaowatembelea [wanadamu] kutoka katika ulimwengu wa roho wakati mwingine wanatoa tahadhari na maonyo ambayo hutokea kuwa ni ya kweli. Basi, imani [ya walio hai] inapoimarishwa hivyo, wanaanza kutoa mafundisho ambayo moja kwa moja yanaihafifisha imani [ya watu hao] katika Maandiko. Huku wakijionyesha kuwa wanapenda sana kuwaona marafiki zao waliomo duniani wakiwa na hali njema ya maisha, wanapenyeza mafundisho ya uongo kwa hila ambayo ni ya hatari sana [kiroho]. Ukweli wa kwamba wanatoa baadhi ya mafundisho yaliyo ya kweli, na wakati fulani wanaweza kubashiri matukio yatakayotokea baadaye, hufanya maneno yao wanayosema yawe na mwonekano wa kutegemewa; mafundisho yao ya uongo yanapokelewa kwa upesi na watu wengi sana, na kusadikiwa kabisa [pasipo shaka lo lote], kana kwamba [maneno hayo] yalikuwa ni zile kweli takatifu sana za Biblia. Sheria ya Mungu [Amri Kumi] huwekwa kando, Roho wa neema anadharauliwa, na damu ile ya agano inahesabiwa kuwa ni kitu kilicho najisi. Roho hizo [mapepo] zinakana Uungu wa Kristo na hata zinamweka Muumbaji kuwa yuko sawa nazo. Hivyo chini ya umbo hilo jipya la kuigiza Mwasi yule Mkuu [Shetani] bado anaendelea na pambano lake dhidi ya Mungu lililoanza kule mbinguni na [sasa] ni karibu miaka elfu sita limeendelezwa duniani humu.

MAONYESHO YA UWEZO WA MAPEPO

Wengi hujaribu kueleza sababu ya maonyesho ya uwezo wa mapepo [miujiza] kwa kusema kwamba hiyo ni hila na kiinimacho kwa upande wa yule kijumbe. Walakini, japokuwa ni kweli kwamba mara nyingi matokeo hayo ya kiinimacho [mazingaombwe] yamefanywa kwa kutumia hila na kudaiwa kuwa ni maonyesho ya kweli, pia ni kweli kwamba kumekuwako na maonyesho yaliyotendwa yanayoonyesha uwezo usiokuwa wa kibinadamu. Kule kugonga-gonga kwa ajabu ambako kulianzisha Imani hii ya Mizimu ya Kisasa (modern spiritualism) hakukutokana na udanganyifu wala hila za mwanadamu, bali ilikuwa ni kazi ya moja kwa moja ya mapepo [malaika] wale wabaya, ambao kwa njia hiyo walianzisha mojawapo ya madanganyo yaliyofanikiwa sana katika kuziangamiza roho za watu wengi. Wengi watanaswa kwa kuamini kwamba Imani hii ya Mizimu ni udanganyifu tu wa kibinadamu; hapo watakapokutana ana kwa ana na maonyesho ambayo watayafikiria kuwa si kitu kingine bali ni mwujiza, ndipo watakapodanganyika, na kushawishika kuyakubali kama ni uweza mkuu wa Mungu.

Watu hao wanapuuzia ushuhuda wa Maandiko kuhusu maajabu yanayofanywa na Shetani na vibaraka wake. Ilikuwa ni kwa msaada wa Shetani wale wachawi wa Farao waliweza kuigiza [baadhi ya] matendo ya Mungu. Paulo anashuhudia kwamba kabla ya marejeo ya Kristo kutakuwa na maonyesho [miujiza] yanayofanana na hayo yatakayofanywa kwa uwezo wa Shetani. Kuja kwake Bwana kutatangiwa na "kutenda kwake Shetani, kwa uwezo wote, na ishara na ajabu za uongo; na katika madanganyo

yote ya udhalimu." 2 Wathesalonike 2:9,10. Naye Mtume Yohana, akiwa anaelezea juu ya nguvu hiyo itendayo miujiza ambayo itajitokeza katika siku za mwisho, anasema kwa mkazo: "Naye afanya ishara kubwa, hata kufanya moto kushuka kutoka mbinguni uje juu ya nchi mbele ya wanadamu. Naye AWAKOESHA wale wakaao juu ya nchi, kwa ISHARA zile alizopewa [alizo na uwezo kabisa wa] kuzifanya." Ufunuo 13:13,14. Huo sio udanganyifu tu unaotabiriwa hapa. Wanadamu wanadanganywa kwa miujiza ambayo MAWAKALA WA SHETANI [2 Wakorintho 11:13-15] wanao uwezo wa kuifanya, sio wanayojifanya kuifanya.

MKUU WA GIZA

Mkuu wa giza, ambaye kwa muda mrefu sana anatumia nguvu zake za akili kufanya kazi ya kuwadanganya watu, kwa werevu anabadilisha majaribu yake kwa wanadamu wa tabaka zote na kila hali. Kwa wasomi na waungwana anawaletea Imani hii ya Mizimu katika hali yake ya kitaalam na kiungwana, naye kwa njia hiyo anafanikiwa kuwavuta wengi katika mtego wake. Hekima inayotolewa na Imani hii ya Mizimu ni ile iliyoelezwa na Mtume Yakobo, ambayo "siyo ile ishukayo kutoka mbinguni, bali ni ya dunia, ya tabia ya kibinadamu, na Shetani." Yakobo 3:15. Walakini, jambo hilo Mlaghai huyu Mkuu hulificha [kwao] anapona kuficha kutamfaa kwa makusudi yake. Yule ambaye aliweza kuonekana amevikwa mavazi ya nuru yanayovaliwa na makerubi walioko mbinguni wakati ule alipomjia Kristo katika nyika ile ya majaribu, anawajia wanadamu kwa njia ya kuvutia kabisa kama malaika wa nuru. Anaishawishi akili kwa kuleta mafundisho makuu yanayowachangamsha sana; anayafurahisha mawazo yao kwa kuwaletea mandhari [matukio] za kuifurahisha mno mioyo yao; naye anayashirikisha mapenzi ya moyoni mwao kwa usemi wake wa ufasaha akionyesha upendo na huruma. Anayachochea mawazo yao yaweze kupaa juu, akiwaongoza wanadamu kujivunia sana hekima yao kiasi cha kumdharau Yule wa Milele mioyoni mwao. Kiumbe yule mwenye nguvu nyingi ambaye aliweza KUMCHUKUA Mkombozi wa ulimwengu huu mpaka juu kwenye kilele cha mlima ule mrefu sana na kuleta mbele yake falme zote za dunia pamoja na utukufu wake, ataleta majaribu yake kwa wanadamu kwa njia ya kuzipotosha fahamu za wale wote ambao hawajalindwa na nguvu ya Mungu.

Shetani anawadanganya watu LEO kama alivyomdanganya Hawa kule Edeni kwa kuwasifu mno, kwa kuamsha tamaa ya kujipatia maarifa yaliyokatazwa, na kwa kuamsha tamaa nyingi ya kujikweza. Ilikuwa ni kwa njia ya kuyapenda sana maovu haya hata yakasababisha anguko lake [Shetani], na kwa njia ya [maovu] hayo anakusudia kupata ufanisi wa kuwaangamiza wanadamu. "Mtakuwa kama Mungu," anasema kwa nguvu, "mkijua mema na mabaya." Mwanzo 3:5. Imani ya Mizimu inafundisha "kwamba mwanadamu ni kiumbe cha maendeleo, hata mpaka milele ataufikia Uungu." Na tena: "Kila mtu atajihukumu mwenyewe wala sio [mtu] mwingine [kumhukumu]." "Hukumu hiyo itakuwa ya haki, kwa sababu ni hukumu inayotolewa na NAFSI yenyewe... Kiti cha enzi kiko ndani yako." Mwalimu wa Imani hii ya Mizimu alisema hivi wakati "utambuzi

wa kiroho" ulipoamka ndani yake: "Ndugu zangu, wote walikuwa nusu-miungu wasioanguka." Na mwingine anasisitiza hivi: "Mtu ye yote mwenye haki na aliye mkamilifu huyo ni Kristo."

Kwa hiyo, badala ya haki na ukamilifu wa Mungu wa milele, ambaye ndiye lengo kuu la ibada; badala ya haki kamilifu ya Sheria yake [Amri Kumi], ambayo ndicho kipimo cha kweli cha mafanikio ya mwanadamu, Shetani ameweka tabia ya mwanadamu mwenye dhambi na makosa kuwa ndilo lengo pekee la ibada, kanuni pekee ya hukumu, au kanuni ya tabia. Hayo ndiyo maendeleo, sio kwenda juu, bali kwenda chini.

KWA KUTAZAMA TUNABADILIKA

Ni sheria ya maumbile kiakili na kiroho kwamba kwa kutazama tunabadilika. Akili inajirekebisha yenyewe kulingana na mambo inayoruhusiwa kuyawaza kwa muda mrefu. Inafanana na kile ambacho imezoea kukipenda na kukiheshimu. Mtu hatapanda juu zaidi ya ile kanuni yake ya usafi [wa maisha] au wema au kweli. Kama nafsi yake ndicho kipeo chake cha juu sana, basi, hataweza kupata kitu cho chote kilicho bora zaidi kuliko hiyo. Zaidi sana, daima atazidi kuzama chini zaidi na zaidi. Akiachwa hivyo peke yake, ni lazima njia yake [ya maisha] itaelekea chini tu.

Kwa yule anayetimiza tamaa zake za mwili pasipo kujizuia, mpenda anasa, na mwasherati, Imani hii ya Mizimu inaletwa kwake kwa kificho kisichokuwa cha siri sana kama kwa msomi na mwungwana; katika mifumo yake michafu sana wanapata kitu kinachoafikiana na mwelekeo wao. Shetani anajifunza kila dalili ya tabia dhaifu ya kibinadamu, anaziangalia kwa makini dhambi ambazo kila mmoja anaelekea kuzifanya, na kisha anahakikisha kwamba nafasi hazitakuwa chache za kutosheleza mwelekeo huo wa dhambi. Anawajaribu watu kwa kutokuwa na kiasi katika kile ambacho chenyewe ni halali, akiwafanya, kwa utovu wao wa kiasi, kudhoofisha nguvu zao za mwili, akili, na maadili. Amewaharibu na bado anaendelea kuwaharibu maelfu kwa njia ya kutimiza tamaa zao za mwili, na kwa njia hiyo kuifanya tabia yote ya mwanadamu iwe kama ya mnyama. Na katika kuikamilisha kazi yake hiyo, anatangaza, kwa njia ya mapepo, kwamba "ujuzi wa kweli unamweka mwanadamu juu ya Sheria;" kwamba "cho chote kilichopo, ni halali;" kwamba "Mungu hahukumu;" na kwamba "dhambi ZOTE zinazotendwa hazina ubaya wo wote." Watu wanaposhawishika kusadiki hivyo kwamba tamaa ndiyo sheria ya juu kuliko zote, kwamba uhuru ni ruhusa [ya kufanya watakavyo]; na ya kwamba mwanadamu anawajibika tu kwake mwenyewe, ni nani, basi, awezaye kushangaa kwamba upotovu na tabia zilizoharibika zimezagaa kila upande? Watu wengi sana kwa furaha wanayakubali mafundisho yale yanayowaacha huru kufanya sawasawa na hisia zao zinazotoka katika mioyo yao yenye dhambi. Kamba za kujizuia wameziweka katika shingo ya tamaa mbaya, nguvu zao za akili na roho zimetawaliwa na mwelekeo wa kinyama wa miili yao, na Shetani akiwa anashangilia anawaingiza katika wavu wake maelfu ya wale wanaojidai kwamba ni wafuasi wake Kristo.

Lakini hakuna haja kwa mtu ye yote kudanganyika kwa kuyasikiliza madai ya uongo ya Imani hiyo ya Mizimu. Mungu ameupa ulimwengu huu nuru ya kutosha kuwawezesha [wanadamu] kugundua mtego huo. Kama ilivyokwisha kuonyeshwa tayari, NADHARIA hiyo inayojenga msingi halisi wa Imani ya Mizimu inayapiga vita maneno yaliyo wazi kabisa ya Maandiko. Biblia inatangaza kwamba wafu hawajui neno lo lote, kwamba mawazo yao yamepotea; hawana sehemu tena katika jambo lo lote linalofanyika chini ya jua; hawajui cho chote kuhusu furaha au majonzi ya wale waliopendwa sana nao waliopo hapa duniani.

MAWASILIANO YALIYOPIGWA MARUFUKU

Zaidi ya hayo, Mungu kwa makusudi mazima amekataza mawasiliano yote na wale wanaojidai kuwa ni roho za waliokufa. Katika siku zile za Waebrania kulikuwa na kundi fulani la watu waliodai, kama wanavyodai wenye imani ya mizimu leo, kwamba walikuwa na mawasiliano na wafu. Walakini "mapepo" hayo kama walivyoitwa wageni wale hayakutoka katika dunia zingine, yanatangazwa na Biblia kuwa hayo ni "ROHO ZA MASHETANI." (Linganisha Hesabu 25:1-3; Zaburi 106:28; 1 Wakorintho 10:20; Ufunuo 16:14.) Kazi ya kushughulika na "wenye pepo" [wachawi] ilitangazwa kuwa ni CHUKIZO kwa Bwana, tena ilikatazwa kabisa kwa adhabu ya kifo. Mambo ya Walawi 19:31; 20:27. Neno hilo la uchawi siku hizi linadharauliwa. Madai kwamba wanadamu wanaweza kuongea na pepo wabaya yanaonekana kuwa ni hadithi za uongo za Zama zile za Giza. Lakini, Imani hii ya Mizimu [Umizimu], ambayo inawahesabu wafuasi wake kwa mamia ya maelfu, naam, kwa mamilioni, imejipenyeza na kuingia katika mazingira ya wanasayansi, imeyashambulia makanisa, nayo imepata washabiki katika vyombo vya kutunga sheria za nchi, na hata kwenye majumba ya wafalme ----- udanganyifu huu mkubwa sana, katika umbo lake la kujificha, ni kurudi tu kwa uchawi ule uliolaaniwa na kupigwa marufuku hapo zamani.

Kama pasingekuwapo na ushahidi mwingine wa tabia halisi ya Imani hii ya Mizimu, ingetosha kwa Mkristo kujua kwamba mapepo hayo hayatofautishi kati ya haki na dhambi, kati ya Mitume adhimu sana na watakatifu wa Kristo na watumishi wale wa Shetani wafisadi mno. Kwa kuwaonyesha watu waliokuwa waovu kupindukia kuwa wako mbinguni na kwamba wamepewa vyeo vikubwa sana huko, Shetani anaiambia dunia hii kwamba: "Si kitu kama wewe ni mwovu kiasi gani, si kitu kama unamwamini au humwamini Mungu wa Biblia. Uishi upendavyo; mbinguni ni nyumbani kwako." Kwa kweli, waalimu wale wa Imani ya Mizimu wanatangaza hivi: "Kila mmoja atendaye dhambi ni mwema machoni pake Bwana, naye anawafurahia; au, Mungu wa hukumu yuko wapi?" Malaki 2:17. Neno la Mungu lasema hivi: "Ole wao wasemao kwamba uovu ni wema, na kwamba wema ni uovu; watiao giza badala ya nuru, na nuru badala ya giza." Isaya 5:20.

Mitume, kama wanavyoigizwa na roho hizo zidanganyazo [mapepo], wanafanywa waweze kusema maneno ya kukanusha yale waliyoyaandika kwa uongozi wa Roho

Mtakatifu walipokuwa hapa duniani. Wanakanusha kwamba Biblia haikutoka kwa Mungu, na kwa kufanya hivyo wanaupasua msingi wa TUMAINI LA MKRISTO na KUIZIMA NURU inayoonyesha njia ya kwenda mbinguni. Shetani anaifanya dunia isadiki kwamba Biblia ilikuwa ni hadithi za uongo tu, au kitabu kilichofaa kwa kizazi kile kichanga cha wanadamu [wa mwanzo], lakini kwa sasa kinafaa kuangaliwa kwa juu juu tu, au kutupiliwa mbali kama kitu kilichopitwa na wakati. Na mahali pa Neno la Mungu anaweka MAONYESHO [MIUJIZA] YA MAPEPO. Hapa ndipo ilipo njia iliyodhibitiwa kabisa na yeye [Shetani]; kwa njia hii anaweza kuifanya dunia isadiki cho chote atakacho. Kitabu kile KITAKACHOMHUKUMU yeye na wafuasi wake anakitupa kivulini, mahali anapotaka hasa kiwe; Mwokozi wa ulimwengu huu anamfanya aonekane kuwa sio zaidi ya mwanadamu wa kawaida tu. Na kama vile askari wale wa Kirumi waliolilinda kaburi lile la Yesu walivyotangaza habari za uongo ambazo makuhani na wazee waliweka kinywani mwao ili kukanusha ufufuo wake [Kristo], ndivyo waumini wa maonyesho [miujiza] haya ya mapepo wanavyojaribu kufanya ionekane kwamba hakuna mwujiza wo wote unaoweza kuonekana katika matukio yanayohusu maisha ya Mwokozi wetu. Baada ya kutafuta kwa njia hiyo namna ya kumweka Yesu nyuma [ili watu wamsahau], wanawataka watu kuiangalia miujiza yao wakijitapa kwamba hiyo inaipita kabisa ile ya Kristo.

IMANI YA MIZIMU YABADILISHA SURU YAKE

Ni kweli kwamba Imani ya Mizimu sasa inabadilisha sura yake, na, ikiwa imeficha baadhi ya mambo yake yasiyokubalika, inavaa VAZI LA KIKRISTO. Lakini maneno yake toka jukwaani na katika vitabu vyake kwa miaka mingi yamekuwa mbele ya Umma, na katika hayo tabia yake halisi inaonekana wazi. Mafundisho haya hayawezi kukanwa wala kufichwa.

Hata katika sura yake ya sasa, mbali na kuweza kustahili kuvumiliwa kama zamani, yamekuwa ya hatari kweli kweli, kwa sababu ni udanganyifu ulio mgumu kuutambua kwa urahisi. Hapo zamani [imani hii] ilimshutumua Kristo na Biblia, sasa INAJIDAI kuvikubali vyote viwili. Walakini Biblia inatafsiriwa kwa njia ambayo inapendeza kwa moyo ule usioongoka, ambapo KWELI ZAKE NZITO NA ZA MAANA zinafanywa kuwa ni ubatili mtupu. Upendo unaongelewa sana kuwa ndiyo tabia kuu ya Mungu, lakini unadhhalishwa na kuwa hisia duni za tamaa ya mwili, bila kuweka tofauti yo yote kati ya mema na mabaya. Haki ya Mungu, kukemea dhambi kwake, matakwa ya Sheria yake takatifu [Amri Kumi], vyote hivyo wao hawavioni [wanavidharau]. Watu wanafundishwa kuiona Sheria ile ya Amri Kumi kama ni waraka uliokufa [yaani, usiokuwa na kazi]. Hadithi za uongo zinazopendeza zinayashikilia mawazo ya watu na kuwafanya waikatae Biblia kama msingi wa imani yao. Kwa kweli, Kristo anakataliwa kama zamani; lakini Shetani ameyapofusha macho ya watu hao kiasi kwamba udanganyifu huo hauwezi kutambulikana.

Kuna wachache mno ambao wanayo dhana sahihi ya udanganyifu wa nguvu hiyo ya Imani ya Mizimu na hatari ya kujiingiza chini ya mvuto wake. Wengi wanachezacheza nayo tu kwa ajili ya kutosheleza udadisi wao. Hawana imani ya kweli katika hiyo, tena wangejazwa na hofu kuu kuwazia kujisalimisha wenyewe ili watawaliwe na mapepo hao. Lakini wanaukanyaga uwanja ule uliokatizwa, na Mharabu huyo mwenye nguvu nyingi anatumia uwezo wake [wa uchawi] juu yao kinyume na matakwa yao. Hebu kwa mara moja tu washawishike kuitoa mioyo yao upande wake [Shetani], atawashikilia mateka. Haiwezekani, kwa nguvu zao, kujinasua na nguvu yake ya uchawi yenye ushawishi aliyowatupia. Hakuna kitu cho chote kinachoweza kuwaokoa watu hao walionaswa, isipokuwa ni uweza wa Mungu utolewao kama jibu kwa maombi ya bidii yaliyojaa imani.

KWA SHERIA NA USHUHUDA

Asema hivi nabii Isaya: "Na wakati watakapokuambia, Tafuta habari kwa watu wenye pepo na kwa wachawi; waliao kama ndege na kunong'ona; je! haiwapasi watu kutafuta habari kwa Mungu wao? je! waende kwa watu waliokufa kwa ajili ya watu walio hai? Na waende kwa SHERIA na USHUHUDA; ikiwa hawasemi sawasawa na neno hili, bila shaka kwa hao hapana asubuhi." Isaya 8:19,20. Endapo watu wangekuwa tayari kupokea kweli ile iliyoelezwa wazi katika Maandiko kuhusu ASILI YA MWANADAMU na HALI YA WAFU, wangeona katika madai hayo na maonyesho [miujiza] ya mizimu kutenda kwake Shetani kwa uwezo wote, na ishara na ajabu za uongo. Lakini basi, kuliko kuachana na uhuru ule unaoafikiana na moyo usioongoka, na kuzikataa dhambi wazipendazo, watu wengi sana wanafumba macho yao ili wasiione nuru hii, nao wanazidi kusonga mbele, bila kujali maonyo, wakati Shetani naye anatega mitego yake kuwazunguka, nao wanakuwa mateka wake. "Kwa sababu hawakukubali KUIPENDA ILE KWELI [KUITUMIA KATIKA MAISHA YAO], wapate kuokolewa," kwa hiyo "Mungu AWALETEA [HAIZUII] NGUVU YA UPOTEVU; wauamini UONGO." 2 Wathesalonike 2:10,11.

Wale wanaoyapinga mafundisho ya Imani ya Mizimu wanawashambulia, sio wanadamu peke yao, bali Shetani na malaika zake. Wameingia katika pambano dhidi ya falme, na mamlaka na majeshi ya pepo wabaya katika ulimwengu wa roho. Shetani hatakubali kuiachia hata inchi moja ya eneo lake isipokuwa kama amerudishwa nyuma kwa uwezo wa wajumbe wale watokao mbinguni. Watu wa Mungu wangeweza kukabiliana naye, kama alivyofanya Mwokozi, kwa kutumia neno hili: "IMEANDIKWA." Shetani naye anaweza kunukuu Maandiko kama siku zile za Kristo, naye ataweza kuyapotosha mafundisho ili kuendeleza madanganyo yake. Wale wanaotaka kusimama katika siku hizi za mwisho za hatari inawapasa wao wenyewe kuuelewa ushuhuda huo wa Maandiko.

Wengi watapambana na roho za mashetani zikija kwao katika umbile la ndugu zao wapendwa [waliokufa] au marafiki zao [waliokufa] na kuwatangazia uzushi wa hatari

mno. Wageni hao wataigusa mioyo yetu na kufanya miujiza ili kudumisha uongo wao. Yatupasa kuwa tayari KUWAPINGA kwa kutumia ukweli wa Biblia usemao kwamba WAFU HAWAJUI NENO LO LOTE na kwamba wale wanaokuja katika umbile hilo ni ROHO ZA MASHETANI.

Karibu sana mbele yetu inakuja "saa ya kujaribiwa iliyo tayari kuujia ulimwengu wote, kuwajaribu wakaa juu ya nchi." Ufunuo 3:10. Wale ambao imani yao haijajizatiti juu ya Neno la Mungu watadanganyika na kushindwa. Shetani anafanya kazi yake kwa kutumia "madanganyo yote ya udhalimu" ili kuwatawala wana wa wanadamu, na madanganyo yake yatazidi kuongezeka daima. Lakini anaweza kufikia lengo lake tu kama watu wanajitoa wenyewe kwa hiari yao kuingia katika majaribu yake. Wale wanaotafuta kwa bidii KUIJUA KWELI na kujitahidi KUZITAKASA ROHO ZAO KWA KUTII, kwa njia hiyo, wakifanya kila linalowezezana [kwa upande wao] kujiandaa kwa pambano hilo, wataipata NGOME IMARA ndani ya Mungu wa kweli. "Kwa kuwa umelishika NENO la subira yangu, Mimi nami NITAKULINDA" (Fungu la 10), ni ahadi ya Mwokozi. Angeweza kutuma kila malaika kutoka mbinguni kuwalinda watu wake kuliko kumwacha mtu mmoja anayemtumainia kushindwa na Shetani.

Nabii Isaya anaufunua udanganyifu wa kutisha utakaowajia waovu, ukiwafanya wajihasabu kuwa wako salama kutokana na hukumu za Mungu: "TUMEFANYA AGANO NA MAUTI, TUMEPATANA NA KUZIMU; pigo lifurikalo litakapopita, halitatuifikia sisi; kwa maana TUMEFANYA MANENO YA UONGO KUWA KIMBILIO LETU, TUMEJIFICHA CHINI YA MANENO YASIYO KWELI." Isaya 28:15. Katika kundi hili linaloelezwa hapa wamo wale ambao kwa kiburi chao cha kutotaka kutubu wanajifariji wenyewe kwa maneno yasemayo kwamba mwenye dhambi hataweza kuhukumiwa; kwamba wanadamu wote, haidhuru wawe waovu kiasi gani, watapandishwa kwenda mbinguni, na kuwa kama malaika wa Mungu. Lakini kwa mkazo zaidi wapo wale wanaofanya agano na mauti na mapatano na kuzimu, wanaozikataa kweli ambazo Mbingu imezitoa kuwa kinga kwa wenye haki katika siku ile ya taabu, nao wanakubali kujificha chini ya uongo [mafundisho potofu] uliotolewa na Shetani badala yake [ile kweli] ----- yaani, madanganyo ya uongo ya Imani ya Mizimu.

Jambo la kushangaza mno lisiloneneka ni UPOFU wa watu wa kizazi hiki. Maelfu wanalikataa Neno la Mungu kuwa halifai kusadikiwa na kwa ujasiri uliojaa shauku kuu wanayapokea madanganyo ya Shetani. Wenye mashaka na wenye dhuhaka wanaushutumu ushupavu wa dini wa wale wanaoishindania ile imani ya manabii na mitume, nao wanajifurahisha wenyewe kwa kuyadhihaki maneno mazito ya Maandiko yamhusuyo Kristo na Mpango wake wa Wokovu, na kisasi kitakachowajia wale wanaoikataa kweli yake. Wanajifanya kana kwamba wana huruma nyingi sana kwa watu hao [wa Mungu] wenye mawazo finyu, duni na ya ushirikina kwa kuyakubali madai ya Mungu na kuyatii matakwa ya Sheria yake [Amri Kumi]. Wanaonyesha kuwa wanayo hakika kana kwamba kweli walikuwa wamefanya agano na mauti na mapatano na kuzimu ----- kana kwamba walikuwa wamejenga kuzuizi kisichopitika, kisichoweza kupenywa kati yao na hasira ya kulipiza kisasi ya Mungu. Hakuna kinachoamsha hofu zao. Wamejitoa kikamilifu kwa yule Mjaribu, wamejifungamanisha karibu sana naye,

nao wamejazwa roho yake kikamilifu, hata hawana nguvu wala mwelekeo wa kujinasua kutoka katika mtego wake.

Kwa muda mrefu Shetani amekuwa akijiandaa kwa jaribio lake la mwisho la kuudanganya ulimwengu. Msingi wa kazi yake uliwekwa kwa matumaini aliyompa Hawa katika Edeni kwamba: "HAKIKA HAMTAKUFA." "Siku mtakayokula matunda ya mti huo, mtafumbuliwa macho, nanyi MTAKUWA KAMA MUNGU, mkijua mema na mabaya." Mwanzo 3:4,5. Kidogo kidogo ametayarisha njia ya madanganyo yake ya kilele kwa kuanzisha IMANI YA MIZIMU. Bado hajafikia kipeo cha hila zake anazotaka kuzitekeleza; lakini kitafikiwa katika siku chache za mwisho zitakazobakia. Asema nabii huyu: "Nikaona roho tatu za uchafu zilizofanana na vyura... Hizo ndizo ROHO ZA MASHETANI, zifanyazo ISHARA [MIUJIZA], zitokazo na kuwaendea WAFALME WA ULIMWENGU WOTE kuwakusanya kwa vita ya siku ile kuu ya Mungu Mwenyezi." Ufunuo 16:13,14. Ulimwengu wote utakumbwa na kuingizwa katika udanganyifu huu, isipokuwa wale WATAKAOLINDWA kwa uwezo wa Mungu kwa njia ya IMANI YAO KATIKA NENO LAKE. Watu kwa upesi sana wanalazwa usingizi katika tumaini la usalama utakaowaangamiza, wataamshwa tu kwa ghadhabu ile ya Mungu [Mapigo Saba].

Asema Bwana: "Nami nitafanya hukumu kuwa ndiyo kanuni, na haki kuwa ndiyo timazi; na mvua ya mawe [Ufunuo 16:17-21] itachukulia mbali hilo kimbilio la maneno ya uongo, na maji yatapagharikisha mahali pa kujisitiri. Na agano lenu mliloagana na mauti, litabatilika, tena mapatano yenu mliyopatana na kuzimu hayatasimama; pigo lifurikalo litakapopita, ndipo ninyi mtakapokanyagwa [mtakapoangamizwa] nalo." Isaya 28:17,18.

----- E.G. White, THE TRIUMPH OF GOD'S LOVE, uk.325-331.

Can the Dead Speak to Us?

OR, THE GREAT CONTROVERSY, Sura ya 34, uk. 551-562.

Spiritualism.

Kwa habari zaidi tafadhali tuandikie:

Leaves of Life – International
S.L.P. 17
Mafinga Iringa Tanzania